

天津縣志卷之十一

河渠志

附漕運  
營田

直沽誌於水經三會詳於通典邑爲澤國由來遠矣自金通漕運水利聿興而由衛達潞邑屬交滙之區故元明以來言水利者詳之

國家

聖聖相承念切民依於畿南河道尤勤

睿慮

特設河院大臣駐節斯土隄防盡善疏濬得宜謹備述之以爲後世章程其從委溯源者平地成天盡關

天津縣志

卷之十一

河渠

一

廟筭志安瀾之永慶實以戴

帝澤於無斃云爾志河渠

邑冀竟二州之地禹貢九河同爲逆河入海卽今直沽地於天文天漢起東方經尾箕之間謂之漢津爾雅析木謂之津是也唐一行分河山兩介以箕尾爲河漢之末派蓋直沽委滙羣流上應星野其明顯如此後世河徙而南故道不復然自覃懷以北太行恒山以東數千里之水如泮水衡漳恒衛禹貢所稱皆會於直沽以入渤海通漕運於東南壯

京師之門戶直沽治則畿輔南北東西羣流暢利速於建瓴不憂積潦自然之勢也故言治畿輔水必自直沽始直沽今謂之海河海河延袤百餘里中有大直沽小直沽大沽葛沽鹹水沽諸名其實皆海河志謂海河長一百二十里涇廣崖深奔流湍駛潮汐迫之則逆行而上禹貢所謂逆河者是宋薛氏程氏黃氏俱謂逆河淪於海今之渤海卽古之逆河蓋未嘗親履直沽得其形勝乃逞臆而爲之辭適見其陋詳古蹟志又謂伏秋之交二運並漲淀水爭趨駢注於三岔一口而強潮牴牾洄漩不下

天津縣志

卷之十一 河渠

二

倒漾橫流

邑人謂渤海經白露乃納衆水

上游隄岸田廬皆受其

浸此豈尋常衝決所得比倫

世宗憲皇帝雍正三年

命怡賢親王興修水利

親授方略南北運河各建壩開河減水分流別塗歸海

畿輔通志謂入口之水減則達海之口寬北永定

南子牙中間七十二清河乃得綽然入三岔口而

東注

廟謨之遠如此海河之西爲三岔口蓋白衛二水會入

海河之咽喉也白水自北來又西受永定河而南

衛水自南來又西受漳滹沱而北滙合於此故曰  
三岔口也白水者沽水也亦曰潞水水經曰鮑邱  
水俗稱大榆河是也出龍門縣獨石口東流出塞  
外又南入密雲縣南流合四十八河貫三角淀以  
歸三岔沽三角淀在武清縣南卽古雍奴水也四  
八水詳治河要覽云白河自通州北石壩至天津  
縣凡三百四十二里漕河圖志云燕趙之間地方  
千里其間巨細河流至武清縣丁字沽注於白河  
一遇雨潦白水滿溢要兒渡口南蔡邨諸處起夫  
塞築勞費萬計逮時乾旱舟又阻淺元志曰盧溝

天津縣志

卷之十一 河渠

三

與白河合流潰決爲患至大二年決武清筐兒港次年  
村延祐初決劉家莊皆興役修塞明萬曆三十一年  
挑通州白河深四尺五寸所挑沙土築隄兩岸  
我

聖祖仁皇帝康熙三十八年河決武清筐兒港次年

親臨視閱

命員外牛鈕等於冲決處建減水石壩二十丈開挖引  
河夾以長隄而注之塌河淀由賈家沽道洩入海  
河楊村上下百餘里河平隄固有

御製碑文誌其事康熙五十年以河西務工程險要

親臨指授命牛鈕開挖引河復以河西務城東有舊河形對新河下口至二里屯長四百餘丈

特命開直河一道次年工成於是新河之溜移流於西而東岸大隄之油刷要兒渡之衝險無虞矣雍正三年大水隄岸埽壩多有衝潰四年 怡賢親王奏請北運河一切工程歸通永道統轄河西務設同知一員楊邨設通判一員分界管理增置縣丞主簿等官以備防修五年河水泛溢東西岸漫決者四六年 怡賢親王奏拓筐兒港舊壩濶六丈展挖引河改築長隄七年疏濬賈家沽道分減一帶距壩稍遠山水暴至漫決上厯

天津縣志

卷之十一

河渠

四

既多消洩亦暢故壩門以下河水安流而河西務

聖懷發帑遴員授之方畧於河西務上流之青灣建壩四十丈開引河注七里海仍展挖寧車沽河導七里海水而洩之北塘口上下分消區畫盡善運道生民均獲寧謐而所費帑金已不下六十餘萬矣衛河者白溝也源出河南輝縣蘇門山東流逕新鄉汲縣又東北入北直濬縣曰白溝淇水入焉又東北至山東館陶合漳河水又東北至臨清與運河合又北至青縣與滹沱合又北至天津與白河

合於三岔口治河要覽謂北自三岔河南至東岸南皮縣西岸交河縣界歷天津靜海青縣滄州凡三百四十五里則其程與白水等河身本古黃河故道蓋自黃河南徙故衛水注之畿輔通志謂近有指古黃河在慶雲者不知彼爲北宋東流之河而非禹河其說方輿紀要及禹貢錐指俱詳辯之詳古蹟志方輿紀要云後漢建安九年曹操於淇水口下大枋木遏淇水東入白溝時淇水入大河故操遏使東北流以便漕運衛河乃附淇水而東淇水見河南淇縣隋大業四年又引白溝爲永濟渠亦曰御河

天津縣志

卷之十一

河渠

五

自是衛河專稱御河而淇水之名遂掩今衛河由濬縣經內黃縣北魏縣東南又經大名城南東北流與故屯氏河相接歷山東東昌府館陶縣西漳河合焉又東北流至臨清州西與元人所開會通河合流濁勢盛漕河得此始無淺澁之虞由此歷武城縣及恩縣之西至北直故城縣南又東北歷山東德州西又北歷北直景州東境吳橋縣西境過東光縣西交河縣東南皮縣西北又抵滄州西及興濟縣西又北至青縣南岔河口而合於滹沱又北至靜海縣與霸州文安縣接界引而東達天

津又東百里而入於海曲折幾二千里此衛河之  
大畧也宋時黃河北流往往浸溢衛河屢費修塞  
元初漕舟涉江准入河至於封邱河南開封府屬縣陸運  
一百八十里至淇門今衛輝府淇縣入於御河達於京師  
蓋用衛河之全也後世復濬會通河乃用衛河之  
半云南運有減水河二一在滄州南十五里一在  
故興濟縣皆明弘治中開以備衛河泛溢久而堙  
塞閘石猶有存者雍正三年大水衛河溢決十三  
口 怡賢親王奉

上命查修水利奏開減水二河各建滾水石壩一座挑濬

天津縣志

卷之十一 河渠

六

舊河分達海港滄青水勢藉以消洩居民賴之然  
衛弱而漳強衛清而漳濁自漳河南徙館陶南運  
獲濟而美溢淤墊往往有之按漳水入直隸界至  
廣平分爲二支一東行經館陶入衛一爲經流東  
北行經山東邱縣復分爲二支一折而東經威縣  
南宮棗強武邑景州阜城交河至青縣杜林邨一  
折而西經廣宗平鄉鉅鹿抵寧晉泊會滏陽至冀  
州合滹沱由衡水歷武邑武強入獻縣完固口由  
單家橋合杜林邨之流至鮑家嘴歸運自威縣而  
東俗曰老漳河自廣宗而北俗曰新漳河其由館

陶入衛者自廣平經魏縣亦分新舊二渠過元城而東注此近日漳水之大槩也又漳自康熙三十三年東徙經魏縣元城縣抵館陶入衛滏水獨行貫寧晉泊至衡水合滹沱畿輔通志所謂衛河至青縣合漳卽漳自冀州合滹沱至獻縣分支南流至青縣之河也據水經注漳河所匯凡七十七水

詳山

而衛水自沮洛谷而下合金谷水

見山川志

復合

漳於館陶湍急爲患雍正四年 怡賢親王奏請分轄隄工立歲修法增汛員以董之又以堤日增高水亦隨長漳河泥濁墊淤於下必致泛溢於上

天津縣志

卷之十一

河渠

七

第河兵挖淺本有考成堤防以禦之疏挖以通之二者可以並行而不悖也三岔口之北爲三角淀周二百餘里爲渤海巨浸白河貫之其西北曰永定河西曰淀河永定河源流衆盛

畿南之水以此爲最

源流詳山川志

自元迄明屢修屢決康

熙三十七年三月

聖祖仁皇帝軫念郊圻親臨閱視命撫臣大築隄防疏濬兼施自宛平之盧溝橋至永平之牛家莊滙狼城河注西沽以達於海延袤二百餘里廣十五丈五月告成

賜名永定自是湍水軌道橫流以寧又陸隴其畿輔地圖記云由盧溝橋達固安分二支至霸復合流名通濟河俗謂霸渾河入玉帶河

聖祖仁皇帝命涿州之老君堂另開河道遷流於東由固安永清出霸州柳岔口入淀達沽三十年積漸闌淤雍正三年

世宗憲皇帝諭令引渾河別由一道毋令入淀遂於郭家務改河東行復開下流之淀河引逕三角淀而注之河頭與清河會周築三角淀圍隄以防其北軼又令逐年挖淺俾河流不致遷徙爲患其慮周矣

但治河錮習不利挖淺而利於築隄改河之後隄日增高而河亦與之俱長長洶河淤塞絕流三角淀所餘無幾於是散漫南行頭道河二道河皆成斷港剩有楊家一河若經汛之後再淤而南則清水無路歸津側注於楊柳青一帶而濁流復從而逆注之其不至穿運而過者幾希計唯疏挖長洶導之東注河頭南岸接築長隄至楊家河而止雖不能必其不再淤而旋淤旋挖可暫爲補救此亦未雨綢繆之義也淀河在縣北五里上承東西淀水以洩之其清河卽淀池之經流也畿輔通志謂



其派有三分自會同河之三汉口經台山而北出紀家淀而東入勝滂河者此西派也由下馬頭經崔家房入張家嘴過任家莊泊歸石溝河者此南派也沿大隄而東經西馬頭堂頭左家莊會石溝河則其支流也勝滂石溝二河總歸臺頭一河經羊糞港而出楊家河至三岔口計長一百四十里自永定下流入淀勝滂河淤而東西二派無下口張家嘴淤而南派無正流唯沿隄一支寬不過二三丈深不過五六尺何以容西來決滯無涯之巨浸乎雍正三年自崔家房以東決隄九處各數十

丈文安城郭宛在水中 怡賢親王開勝滂河十七里而東西二派下口遂通挖張家嘴河五里而沿隄一支分流北注又於上流疏濬中亭河四十餘里自口頭對岸之下河門分引玉帶河水入臺山河其下流石溝臺頭淤淺之處槩行撈挖數載以來清流湍駛隄防晏如治淀之效如此東淀延袤霸州文安大城武清東安靜海之境東西百六十餘里南北二三十里及六七十不等蓋七十二清河所匯也永定河自西北來

今入三角淀

子牙河

自西南來咸入焉其大勢東西淀之局各三南泊

之局一北泊之局四西淀跨雄新數邑西北諸水所滙也西曰長流滿城安肅諸水滙之西北曰白溝易州涑水諸流滙之西南曰高陽唐縣慶郡諸流滙之其白洋淀四角河趙北口柴禾淀會同河中亭河蘇家橋皆其通東淀之咽喉也

以上俱詳山川志

一統志云會同河在霸州南十三里又名苑口河本玉帶河也自保定縣流入州界又東北曲折行可十里爲善來營北岸有渾河口又東可五里爲苑家口又東五里爲蘇家橋河流至此分爲三道卽所謂三汊口也一云玉帶河至本州境會渾河

天津縣志

卷之十一

河渠

十

東下名會同河分二支俱流經文安縣境散入石城等淀本河正派至州東無梁閣名邊家河又分一支入永清縣界名信安河其正流曲折而東入文安諸淀又東逕東安縣界爲呂公河通志謂會同爲玉帶之下流出自西淀之茅兒灣至霸州而拒馬桑乾胡良霸水皆會焉故名會同河今諸河俱已改流唯栲栳圈一河南北相望卽中亭河也首尾皆淤斷而會同河身寬不逾二十丈或十五六丈總會順天保定正定三府西山一帶三十餘河之水勢不能容則蕩擊爲暴決何家道口決鹿

曠決下武各莊決保定縣幾無虛歲雍正五年中  
亭河開通分流北去玉帶之水十減二三但河身  
本淺於正流而新開之牝牛河自西栲栳圈會入  
挾擁泥沙復加闡淤則浚治之工有不可一日緩  
者其會同下流之信安河已成陸地卽勝勞至辛  
張逕褚沽東沽二港達王慶之一支名呂公河者  
亦無河形唯餘臺頭一派爲正流則上自石溝下  
至楊家河通塞淤暢所關最鉅此河道全局之利  
害也中亭河亦名新挑河在霸州南八里綿亘數  
十里按此卽古中亭河也亦曰栲栳圈河明霸州

道鳳靈治北河議云霸當京邑之陽川原漫衍羣  
水赴焉口外諸山之水自京西蘆溝橋而下經固  
安永清滙於三角淀此霸州以南之水也宣府紫  
荆白溝諸水自新城而下會於茅兒灣經保定玉  
帶河達於苑家口至於信安直沽入於海易安苑  
肅唐蠡九河之水自雄南下東過茅兒灣入苑家  
口山西五臺之水自河間而下經任邱滙於五淀  
亦入苑家口此霸州以南之水也南北二川水至  
則瀾漫浩淼文安大城積爲巨浸治之法不以壅  
而以導不先於決口而始於下流觀直沽之上有

大淀有小淀有三角淀廣延六七十里深止四五尺若因而增益之又爲之隄以停蓄衆水而委輸於海水固有所受也康熙三十八年

聖祖命河臣王新命開挑上接十望河下入臺山河分減玉帶河水勢發帑築隄上下各六工上六工距河稍遠以護州治下六工縷河爲隄以護田廬增設州判一員管理每歲按里出夫隨時修補後渾河淤至勝芳下流遂塞而十望河自張青口來者爲白溝流沙墊淤上流亦斷自是隄工殘廢而下六工無復遺址與積淀相連雍正三年 怡賢親王

天津縣志

卷之十一

河渠

三

奏開中亭十望二河四年中亭河工竣十望河以積水未開五年大水難以興工遂罷十望之役自口頭對岸之下河門挑引河一道分玉帶河水而注之中亭河增設吏目一員分汛防修七年州判陳起唐捐貲修築下六工隄長四十里其牝牛河

畿輔通志在良鄉東南卽古福祿水水經注聖水又東廣陽水注之東逕廣陽城又東福祿水注焉

爲鹽溝廣陽二水之會流經三义口南流至任邱西南入大清河每遇伏秋山水漲發奔騰衝突故名牝牛河良涿固霸之間累被其災雍正四年怡賢親王奏請於任邱南開挑新河東南涿州界

東逕固安縣西北循盧溝河故道南徑霸州之南  
孟村等地東南抵西栲栳圈入中亭河長二百餘  
里自是奔突之患乃息子牙河爲南北泊及滹滏  
之尾流南泊卽大陸澤順德百泉諸水滙之詳山川志  
王原祁大陸澤圖記云九河之水皆滙焉九河爲  
洛沙蔡馬灃達活百泉滏陽九河之外尙有泆沛  
等八河而滏陽則自穆家口瀉大陸之水經隆平  
寧晉直下天津自萬曆二十六年漳河溢於滏陽  
而隆平以下易淤於是滏陽決而東徙大陸之水  
因從雞爪以東瀉於新決之滏陽康熙中漳水東

徙滏陽自貫北泊而出雍正中開穆家口濬雞爪  
等溝注之北泊下抵冀州合滹沱陸隴其畿輔地  
圖記云滹沱河歷高城晉州束鹿至冀州會漳滏  
二河過衡水武邑武強至獻縣爲二支一東流爲  
鹽河一南流交河縣抵青縣岔河口入衛禹貢錐  
指云滹沱於順治二年從冀州合漳水畿輔通志  
云滹沱漂悍亦稱渾水自獻縣分流經交河縣抵  
青縣南七十里杜林鎮與漳河會昔時高陽深澤  
皆河所經今徙而南在束鹿晉冀之間衝嚙爲甚  
又云自獻縣分流一由大城爲子牙河卽漢志所

云從河東至文安入海者此正流也一至青縣杜林鎮合漳卽水經注所云衡水東北左會滹沱別河故瀆謂之合口者此支流也近志以子牙爲滹沱之別支誤矣許汝霖北河

聖功頌序云滹沱合漳滏諸水謂之胡盧河自深州武強至獻城南曰完固口分而爲二一西南由單家橋入交河縣又東至青縣鮑家嘴入衛河一西北由臧家橋至河間府龍華橋又北逕大城縣爲子牙河歸三角淀磁州志云漳滏合流至冀州合滹沱至獻縣分爲二一由單家橋六十里至淮鎮又

天津縣志

卷之十一 河渠

古

四十里至高州又六十里至滄州之杜梨木又五十里至交河縣界又二十里至青縣入運河一由臧家橋六十里至河間縣之沙河橋又六十里至河間縣之龍華橋又六十里至大城爲子牙河大城縣志云沿河自河間龍華橋轉入大城縣馬村徑白洋渡四呈口東匯黑龍港亦名交河北折趙扶村又北逕子牙村故名子牙河畿輔通志云滏陽河貫寧晉泊出至衡水縣界滹河出泊合流徑冀州武強獻縣河間青縣大城爲子牙河出王家口歸三角淀亦名沿河康熙三十九年

聖祖仁皇帝親閱河工

特授方畧發帑於獻縣河間東西兩岸高築長堤西接大城東接靜海各二百餘里又於廣福樓之焦家口開新河一道東北至賈口入淀與子牙河入淀處距二十餘里設分司一員董其事雍正三年撤回分司歸天津道統轄其子牙河至王家口入淀分爲二派一派東流逕瓦子頭斷隄村岳莊莊頭村過王家泊抵臺頭會清河而東一派西流徑文安土橋村至趙家莊又分二支西支抵文安大隄而北至龍塘北支逕三灘里至張家營抵石溝河

天津縣志

卷之十一

河渠

五

雍正四年西流自淤正流俱由瓦子頭一支按永定淀泊不在縣境而必及之者負舟者視其積觀水者必於瀾循流溯源其理然也又鳳河其源自南苑中流出經武清之堠上村河身易淤雍正四年怡賢親王引高各莊凉水河入鳳河故道挑挖過雙口抵青沽港入淀河仍建二閘分流之處隨時啓閉以濟運河塌河淀及七里海則卽北運河筐兒港青龍灣二處藉以蓄洩者畿輔通志謂其旣無大源多涸竭居民往往占耕爲業水利幾廢故附存之縣南運河堤工自三岔河南至碾坨

嘴計五十一里河兵四十一名縣丞把總分轄管領土牛柳園兵房與上游各州縣等同隸津軍同知其歲修錢糧河兵餉銀於水利地糧項下支給北運河河工通永道主之

附陸公堤 在西門外藏經閣前萬曆三十二年教塲口岸衝決浸及城磚二十四層有清軍同知陸敏捷申請題留兩營班軍修護城堤一道繞城西南二面以絕水患至今名陸公堤

### 附漕運

金都於燕東去潞水五十餘里爲牐以節高良河白

## 天津縣志

### 卷之十一

附漕運

六

蓮潭諸水通山東河北之粟凡諸路瀕河之城則置倉貯之若恩州之臨清歷亭景州之將陵東光清州之興濟會川獻州及深州之武強是五州諸縣皆置倉之地也其通漕之水舊黃河則行滑州大名恩州德州舊滄州會川之境漳河東北爲衛河則通蘇門獲嘉新鄉衛州濬州黎陽魏縣彰德磁州洛州之漕衡水則經深州會於滹沱以來獻州清州之漕皆合於信安海墻泝流至通州八牐十餘日而後至於京師其他若霸州之拒馬河雄縣之沙河山東之北清河其灌輸之路也

荆川  
稗編



元中統二十四年分立都漕運司於河西務乃止領  
在京諸出納糧斛及新運糧提舉司站車僸運公  
事其在河西務者掌御河上下至直沽河西務李  
二寺通州等處僸運糧斛各置運使二人正三品  
同知二人正四品副使二人正五品判官二人正  
六品續文獻通考  
至元十二年始運江南糧二十九年用伯顏議初  
通海道漕運直抵直沽以達於京師立運糧萬戶  
府三以南人朱清張瑄羅璧爲之初歲運四萬餘  
石後累增及三百餘萬石春夏分二運舟行風信

天津縣志

卷之十一

附漕運

七

有時自浙西不旬日而達於京師內外官府吏士  
人民無不仰給於此河間府志

至元十六年通惠河運糧千戶所秩正五品掌漕  
運之事分立都漕運使直沽廣通倉秩正七品續文

獻通考

明洪武三十年以遼東軍餉有餘遂止海運永樂三  
年令總督糧儲官於天津城北造露囤一千四百

所以下河間府志

永樂六年二月命平江伯陳瑄總督海運赴北京  
遼東瑄因創百萬倉於直沽尹兒灣城天津衛籍

兵萬人戍守焉

永樂十三年始罷海運而專事漕河今之衛河自臨清北至天津是也

衛河自臨清州經故城景州吳橋東光南皮交河滄州興濟青縣靜海下直沽入海共長一千一百里今爲運河成祖定鼎燕都仰給焉每旱乾水溢輒發丁夫修治弘治己酉戶部侍郎白圭多築渠堰於徐兗瀛滄之間以殺水勢漕艘所經地方皆設淺夫有差歲爲常云

大明會典

正統間差工部郎中王俊提督通州至天津河道

天津縣志

卷之十一

附漕運

六

工部爲催僨糧船事都水清吏司案呈本部仍行漕運總兵等官嚴督軍運糧船依限到京交納一行天津等處收糧官員俱不妨原委但遇糧船到彼卽便各照地方催僨至通州俱令星夜前進不許因事拘留聽點反致遲悞事完各將催過運船互相交付各數呈部查考

以下續文  
獻通考

英宗天順四年僨運糧四百三十五萬石內兌運三百六十三萬八千二百石淮安臨清徐州倉支運七十一萬一千八百石內遮洋船運三十萬石以二十四萬石於蘇州倉收六萬石於天津衛倉

收

國朝沿河鎮道將領等官並僱漕運

以下大清會典

順治二年差御史一員催僱漕運

順治五年覆准每年重運過畢通惠河分司責令回空官丁開列姓名船數投司詳定期限給單押至天津投天津道轉單至濟寧總河查驗換牌註限至淮安總河查驗責令沿河文武各官嚴催不許時刻停留

順治七年覆准運船交卸後卽照數交密雲道自通州起押至天津天津道督押出境武德東昌各

天津縣志

卷之十一

附漕運

九

道督押至淮安呈明總漕至江寧呈明兩江總督至杭州呈明浙閩總督各該道逐程遞押交割該管衙門接濟新運遲悞該道及原領官丁議處

康熙元年覆准漕船出境入境天津南北沿河道官五日揭送倉督磨對凡起糧剝船脚價原額天津關剝船六百隻土壩外河剝船一百五隻裏河剝船二十五隻石壩外河剝船二百八十隻裏河壩經紀原額口袋三十四萬條漕船至楊村以北遇有淺阻天津關發剝船接濟

又康熙元年覆准漕船抵天津例有截留如一幫不敷卽挨幫截留不得先後攙越

康熙二十四年議准天津紅剝船既經按船給地其水脚銀兩裁去

附舊志淺夫

天津中衛淺夫一百名舊額淺鋪十一每鋪小甲一名夫九名修堤小甲五名夫四十五名

河間府志

中所南河口淺鋪十座蔡家淺界宿淺王家淺呂家淺西漫撒淺東漫撒淺馬家淺王家淺辛庄淺

潑莊淺

天津衛志

天津縣志

卷之十一

附漕運

三

天津左衛淺夫一百四十名舊額淺鋪二十四每鋪小甲一名夫九名修堤小甲五名夫四十五名

河間府志

左所南河口淺鋪十四座流佛寺淺南捷堤淺官莊口淺許家口淺石堂口淺朱家墳淺南橫隄淺

北橫堤淺索家馬頭淺安都塞淺高家馬頭淺大

掃灣淺張家口淺莫家口淺

天津衛志

天津右衛淺夫五十名舊額淺鋪十每鋪小甲一名夫九名修堤小甲五名夫四十五名

河間府志

右所南河口淺鋪五座馬家口淺蕭家口淺白洋

橋淺南陽口淺北陽口淺

天津衛志

乾隆元年題准改淺夫為河兵

附運船

各省原額漕船共一萬一百七十隻康熙十一年現運船七千九百六十四隻內通津等衛三十九隻協運河南千總於廩俸外兼支行糧二石四斗運丁每名行糧二石四斗行月皆在河南糧道支給

大清會典

中所運船八隻每船屯丁十二名共九十六名每

名月糧八斗地五十畝

以下天津衛志

天津縣志

卷之十一

附漕運

三

左所運船六隻

屯丁糧地同

右所運船六隻

屯丁糧地同

按大清會典舊有河南糧道屬領運天津千總一員考近例河南糧道久經奉裁惟左右兩所千總隸本府管轄一管軍犯一管領運河南漕糧迺年更番出運運丁十七名隸天津道管轄

附薊運

明穆宗隆慶二年順天撫臣劉應節等以永平西門直抵海口至天津凡五百餘里可通漕路議令永平通判及指揮等官募諸縣民習知海道者與俱

赴天津領運仍同原運官軍駕海舟出大洋至紀谷莊更小舟運至永平倉其造船水夫諸雇募轉搬之費取諸漕運糧輕齎及食粟之餘者戶部覆言故事獨薊遼有遮洋總而無永平海運今驅漕卒冒不測之險於計不便卽如撫臣等言謂以山東河南額派薊鎮漕運分撥折色十萬石俱改本色運至天津交兌永平通判指揮等官徑自領運不必同原運官軍其沿途轉搬入倉工費皆如漕規扣給以原撥永平民運及太倉所發年例如數抵運薊州時從部議

名山藏

天津縣志

卷之十一

附漕運

三

明初海運一十三衛管駕遮洋船由直沽海口開洋運至薊州歲有疎虞天順二年以大河衛百戶閔恭言命都督僉事宗勝御史李敏工部主事李尙發軍夫萬餘開河自新開沽起至薊州長四十里舟行無虞定例三年疏濬一次

畿輔通志

景泰二年由北塘河口開引新渠由是天津糧艘由直沽逕寶坻之潮河而上沂於薊州卽今所云薊運河也至嘉靖三十四年遏潮河不使入順義竟由密雲合白河

水部備攷

自密雲城西楊家莊築塞新口疏通舊道令白河

與潮河合流至牛欄山水勢甚大故通州漕運得達密雲城下是潮河之在密雲者合白河而下達於通州卽今所云北運河也

方輿紀要

嘉靖元年正月命工部主事江珊督理新河工程先是漕舟從天津出海復折入梁河而達薊州議謂直沽東北岸有二道一曰新開一曰水套北接梁河徑四十里可以疏濬成河詔從行之謂之新河歲久湮塞乃復命珊督疏

肅皇實錄

附營田

天津局

以下並見畿輔通志

天津縣志

卷之十一

附營田

三

天津營田全資潮汐一面濱河三面開渠與河水通潮來渠滿則牖而留之以供車戽中間溝塍地埂宛轉交通四面築圍以防雨澇皆前明汪司農應蛟遺制也汪公至天津見白塘葛沽一帶地斥鹵不耕種間有近河藝豆者每畝收不過二斗以謂此地無水則鹹得水則潤若以閩浙瀕海治地之法行之穿渠灌水未必不可爲稻田而一時文武將吏諸人無肯應命也公乃以身倡之捐俸買牛制器開渠築堤先於葛沽白塘二處種水稻二千餘畝收四五石餘種葛豆得水灌溉糞多者

一畝收一二石惟旱稻以鎌立稿於是軍民始信  
閩浙治地之法可行於北海而各官益信斥鹵可  
盡變爲膏腴也於是疏請於朝以防海官軍萬人  
分田墾種屯政大興至今土人猶傳十字圍所謂  
求仁誠足與食力古所貴者是已惟是民雜五方  
逐魚鹽之利取足旦夕而不爲久遠之計雖禾麥  
之植亦鹵莽從事至沾塗升挽之勞益視爲畏途  
以故旋舉旋廢雍正五年營田十圍今存者賀家  
口葛沽兩圍而已開局之始 賢王深思遠攬以  
天津當河海咽喉爲

天津縣志

卷之十一

附營田

十四

神京牖戶而謠俗偷惰逐末忘本野多未闢之土家  
無擔石之儲闐闐熙穰田疇蕭寂無以仰副

聖天子加意郊圻移風易俗之至意又覽左忠毅光斗  
屯政諸疏大興水利於天津一帶稻花茂密因慨  
然欲復汪司農之舊蹟發帑委員尋求經理而積  
習猝難丕變美意未及觀成然圍渠遺趾現存稍  
加修葺未始不可漑糞沃淤長我禾麥也爰紀梗  
槩不忘厥初云爾

天津州

今改  
爲縣

城南藍田及賀家口圍田引用海河潮水仍洩水



於本河按藍田康熙間鎮臣藍理所開也河渠圩岸週數十里墾田二百餘頃召浙閩農人數十家分課耕種每田一頃用水車四部插蒔之候沾塗徧野車戽之聲相聞秋收畝三四石不等雨後新涼水田漠漠人號爲小江南云理陞任去奏歸之官是後經理無人圩坍河淤數載廢爲荒壤雍正五年營田天津津農不習水種率逡巡觀望乃作秧池於藍田以倡導之濬舊渠引潮水灌溉滋培秧苗著盛於是官民競勸共營田三十餘頃俱獲收穫六年營田觀察使黃世發自營五頃耕耨得

天津縣志

卷之十一

附營田

三十五

宜畝收五六石刈穫之際傳集各圍地戶共觀之賀家口圍其西半卽藍田也東瀕海河因橋建閘周圍築埝圍內開渠縱橫貫注共營田三十八頃九十二畝官民自營田九頃

靜海縣

今歸天津縣

何家圍吳家嘴雙港白塘口辛莊等圍營田引用海河潮水仍洩水於本河按何家圍地勢平坦土性滋潤天然秔稻之鄉前明撫臣汪應蛟相度屯田以此爲首圍中有官莊圍南有大人莊詢據老民當時屯田及屯田御史屯田道廳等官駐劄於

此故名雍正五年循照溝圍舊蹟開築營田八十三頃十六畝民間自營田二十三頃四十畝

吳家嘴圍三面臨河民間就沽道爲園圃在津田向稱上產五年委員開築於馮家口建閘引水并設涵洞三座分渠灌溉營田二十七頃九十二畝民間自營田十四頃四十一畝

雙港圍亦汪應蛟屯田舊地也循照故蹟開築東與何家圈溝渠相通兩圍互爲蓄洩營田三十八頃二十五畝五分民間自營田三十八頃七十二畝

天津縣志

卷之十一

附營田

三

白塘口圍河形閘基皆汪應蛟屯田故蹟以董太僕應舉於天啓中修復之故遺制猶存委員開築卽用閘基舊石添砌建造并設涵洞二座營田六十四頃六十七畝民間自營田四頃七十二畝辛莊圍亦汪公屯田舊地也邨東西各有沽河一道西河卽屯田故渠東河則津人鄭衛引水種稻所開也地勢平潤強潮內涌往往波及田間本與陸種不宜委員疏濬二河各置閘一座圍內溝渠交注引新洩故留沃去鹹最爲適宜營田六十一頃六十二畝民間自營田五十九畝

滄州 今歸天  
津縣

葛沽盤沽二圍營田引用海河潮水仍洩水於本  
河按葛盤二沽畛域聯接自汪公應蛟肇開水田  
土人至今習知其利插蒔不絕亦能自製水車不  
以升挽為苦所產稻米幾與白玉塘齊名五年委  
員分建圍圩開渠置牐民地官荒營至五十九畝  
民間自營田四頃九十一畝

興國富國二場 今歸天  
津縣

東西泥沽二圍營田引用海河潮水仍洩水於本  
河按泥沽距海口六十餘里河至此愈深闊潮來

天津縣志

卷之十一

附營田

七

愈大亦汪應蛟舊屯地而董公應舉令經歷趙鑑  
等修復之河形宛在溝塍之迹猶歷歷也循照開  
築東西圍各建進水閘一座洩水涵洞各二口營  
田三十五頃二十七畝民間自營田六頃二十八  
畝

按天津舊為衛治郊郭便叅鄰境改州之後疆  
界未分故營田十圍自藍田賀家口而外隸靜  
海縣者五隸滄州者二隸興國富國二場者各  
一至雍正九年設府改縣更定幅幘諸圍地畝  
皆歸隸天津縣矣今仍營田府原冊所開編次

用存其舊云

天津縣志卷之十一 終

天津縣志

卷之十一

附營田

三